

Dörfligeischer 1989

Wüsst dir, worum mir Geischer mit Tannli uf de Gringe
Und Glitzer-Girlande üsi Värslü tüe singe ?
Mir hei drum chuum Zyt gha zum Baschtle und Uebe,
Wüu me d' Fasnacht fasch uf d' Wiehnacht hett muesse verschiebe !

Wie der FC tuet schutte, chönnt Mitleide errege,
Der Weidle wirft ds Handtuech, loot d' Närke lo pflege,
Ou der nöi Trainer, mit Name Mandziara,
Chlagt: "Ohni Lohn z' schaffe, das isch doch e Schmarra !"

Bim Kaiseraugscht AKW isch der Schalter uf uus,
Anderthalb Milliarde verlochet und kei Pfuus,
Und was si bi däm Verluscht nid mit Stüüre ystryche,
Das wärde mir mit der Stromrächnig beglyche !

Im Twanner hetts Zucker, das gäb däm Wy Chraft,
Das heisst, s' git chli meh Alkohol i dä Saft,
Mir hei drum e Vorschlag, der Twanner umztoufe,
Und ne schlicht als "Aarbärger Rüebesaf" z' verchoufe !

Der Ben Johnson isch dopet und und nimmt derdür Schade,
Me gheht ne schier waagrächt us der Olympiade,
Doch ei Froog blibt offe, ob all' anger eifach so
Ihri Muskle vom Mueslifrässe hei übercho ?

Vor em Billet-Outomat steit eine im Trolley,
Loot Fränkli um Fränkli i Schlitz, wie-n-e-Tscholi.
Är seit : " I spile witer, i tue doch nid spinne,
Und höre nid uf, solange dass i gwinne !"

Der Regierigsrat Meyer isch für e frei Drogehandu,
Doch eine wehrt sich bsungers gäge dä Wandu,
So meint der Hans W. Kopp, die truurigi Fläsche:
"Si d' Droge legal, git's kei Gäld meh zum Wäsche !"

Was dir do hie gseht, dir wärdet's erfahre,
Das isch kei Zigarre, wo tuet velofahre,
Jetzt gloubet aber nid, mir wöu euch Seich verzeue,
Mir tüe euch nume der nöi Bundesrat vorsteue !